

佛說無上處經

失譯人名今附東晉錄

如是我聞一時佛在舍衛國祇樹給孤獨園
爾時世尊告諸比丘有三無上處汝等諦聽
當爲汝說諸比丘白佛唯然受教佛告比丘
三無上處者一佛無上處二法無上處三僧
無上處若諸衆生兩足四足無足多足若色
無色若想無想非想非無想如來於中說無
上處諸比丘若有衆生能於佛無上處起信
向心者於天人中得無上果報諸比丘是名

初無上處復次諸比丘於有爲無爲色無色
法離欲法爲無上處諸比丘若有衆生能於
此法無上處起信向心者於天人中得無上
果報諸比丘是名第二無上處復次諸比丘
僧無上處者若僧若群若叢聚若徒衆中如
來弟子僧爲無上處諸比丘若有衆生能於
此僧無上處起信向心者於天人中得無上
果報是名三無上處時諸比丘聞佛所說歡
喜奉行
佛說無上處經